



**Meeqqat inuusuttuaqqallu angerlarsimaffiup avataanut inissinneqartartut ikilisinniarlugit ilaqutariinnut iluaqutaasumik siusissukkut iliuuseqartarnissamik Naalakkersuisut pilersaarudioqqullugit peqquneqarnissannik Inatsisartut aalajangiiffigisassaattut siunnersuut. Pilersaarussiaq juli 2022 naatinnagu tamanut saqqummiunneqassaaq.**

(Inatsisartunut ilaasortaq Jess Svane, Siumut)

## **Siullermeernera**

Inatsisartunut ilaasortaq Jess Svane, Siumut siunnersuutaannut siullermik Naleqqamiit qujassuteqarfigaarput siunnersuut saqqummiummagu: Meeqqat inuusuttuaqqallu angerlarsimaffiup avataanut inissinneqartartut ikilisinniarlugit ilaqutariinnut iluaqutaasumik siusissukkut iliuuseqartarnissamik Naalakkersuisut pilersaarudioqqullugit peqquneqarnissaannik Inatsisartut aalajangiiffigisassaattut siunnersuut saqqummiummagu. Pilersaarusiartu juli qaammat 2022 naatinnagu tamanut saqqummiunneqassasoq siunnersuuteqarnermini kissaatigalugu.

Siunnersuut pillugu Partii Naleqqamiit soqutigalugu oqaluuserisaqisarput qaqilerneqartoq pillugu imatut siunnersuummut oqaaseqaateqassaagut.

Politikkikkut ukiorpassuannortuni meeqqat angerlarsimaffiup avataanut inissinneqartartut pillugit oqalittarnerit tamatumalu kingunerisaanik qanoq iliuuseqarnissamik siunnerfeqarnerit qitiusumiit kommunimiillu ingerlanneqartuarsimapput.

Angerlarsimaffiup avataanut meerannguit inissinneqaraangata meeqqamut imaannaanngitsuvoq taamatullu angajoqqaanut taamatut aqusaagaqartunut imaannaanngitsorujussuulluni, taamaamat taamatut iliortoqannginnerani qanoq iliussissat periarfissat kingullersaattut atugassaasoq Naleqqamiit isumaqarpugut.

Angerlarsimaffiup avataanut meeqqanik taamatut inissiisarneq imaannaanngitsoq inatsisitigut toqqammaveqarluni iliuuseqarneruvoq meeraq qitiutillugu qanoq iliuuseqarnerusarluni, tassalu meeqqap arlaatigut peqqissusaanut ineriartorneranut arlaatigulluunniit innarlerneqarsinnaanera pinaveersaartinniarlugu iliuuseqaataasarluni, taamatullu meeraq sumiginnagaalluni inissisimasarsimappat aammalu atornerluisoqarsimappat paarinerluinikkullu arlaatigut peqquteqarpat. Peqqutaasartullu annertuut ilagaat imigassamik ikiaroorntunillu angajoqqaat



atornerluineriat tarnikkut nappaateqarnerat arlaatigullu inatsisinik unioqqutitsinerit aammalu meeqqat ajornartorsiuteqalersimanerat, meeqqap ineriartornerata kinguarsimalersimanerat naleqqussarsinnaaneratalu killeqalersimanerat. Peqquaterpassuit assigiinngitsut toqqammavilersuutaasarsimapput pisortat meeqqat inuusuttullu angerlarsimaffiup avataanut inissinneqartarnerinut peqqutaasut amerlasuujupput assigiinngiaartut, tassanilu inerniliunneqartuusarluni qitiusarpoq meeraq innarlerneqarluni sumiginnagaalluni arlaatigulluunniit akornutigissaagaa nalilerneqaraangat angerlarsimaffiup avataanut inissiineq pisariaqalersarluni.

Ullutsinni meeqqat atugarliunnginnissaat ukkatarisorujussuuarput aammalu meeqqat atugarliortut Naalackersuinikkut iliuseqarfiginissaat pingaartinneqartorujussuupput.

Taamaamat siunnersuuteqartoq Jess Svane meeqqat tamarmik pisariaqartitaminnik ikiorneqartarnissaannik qulakkeerinninnerunissatsinnik iliuseqarnissatsinnik qaqilerinera Naleqqamiit isumaqatigilluinnarparput.

Naleqqamiit isumaqarpugut angajoqqaat suleqatigalugit meeqqap angajoqqaaminiinnissaa sukumiinerusumik ingerlanneqartariaqartoq pitsaaliuinerit angajoqqaanut aamma angajoqqaanngortussanut meeqqap naavaniinneraniit suliniutit ingerlannerusarneruneratigut. Meeqqanut angajoqqaat pingaarnerpaapput aammalu pingaaruteqartorujussuarmik inissimasuunerat qitiusariaqarpoq suliniuteqaqqittarnerni.

Angerlarsimaffiup avataanut allatut ajornavippat inissiisarnerni angajoqqaarsiat ilaqutariit atornerqarlarnissaat innersuussutiginarlorujussuupput, tamatumunngalu tunngatillugu maannakkut angajoqqaarsiaasartut nersorusuppagut meeqqanik pisariaqartitsisunut maannakkut angajoqqaarsiarpassuit inuiaqatigiinni pitsaasumik sunniuteqarlutik meerannguanik pisariaqartitsisunik ikiuisarmata akisussaaffimmik annertoorujussuarmik tigusarisarnermikkut.

Kommunit qanimut sullissisuusut taakkulu suliniuteqarnerat pillugu qanimut suleqatiginissaat qitiusumiit pingaartorujussuuartut Naleqqamiit isigaarput tamatumalu nukittorsarfigeqqillugu inerisaqqinnissaa kaammaattuutigerusullutigu.

Ilaqutariit qitiutillugit taamatullu aallaavigalugit suliniutit arlallit angajoqqaat sumiginnaanerannik pitsaaliuiffiusut ingerlanneqalereersimasut Naalackersuisut akissuteqaatiminni oqariartuutaat taamatullu meeqqat inuusuttullu angerlarsimaffiup avataanut inissinneqartarnerisa



pinaveersaartinnissaanut suliniutit taakku iliuuserisanut ikorfartuutaassasut oqarituutigineqartut Naleqqamiit sunniutissai pitsaasuunissaat neriulluarfigaagut.

Qallunaat nunaat meeqqanut inuusuttunullu atugarliortunut pillugit oqartussaaffiisa kommunit suleqatigalugit suliarineqartut ataavartumik kommunit suleqatigineqarnerat tusarluarnarpoq taamaasilluni suliat 2020-imi aallartittut 2023-ip tungaanut ingerlanneqartussaasut Naleqqamiit neriuteqarfigilluaratigit oqaatigissavarput.

Nunatsinni meeqqat illersuisoqalersimanitta kingunerisaanik arajutisassaraluagut qulaajarlugit nunap inuilu sineriammi tikillugit suliaqartarnerminni qaqilertagaat pillugit oqaluuserineqarusunngitsut qaqilerlugit iliuuseqartuarmarta, taamatullu Partiinut tamanut saqqummiuarnermikkut pissutsit piviusut pillugit anngusaqartuarnermikkut sunniuteqarluarnerat pillugu Naleqqamiit qujassuteqarfigerusuppagut meqqat atugaat pillugit pitsaanerusemik atugaqalernissaanik anguniagaqarluarnermikkut meeqqanut illersuilluarmata qujamasunneq annertoqaaq. Taakkulu tusaaneqartarnissat inaasuteqaataalu tusaaneqartuarnissaat Naleqqamiit pingaartutut isigaagut.

Meeqqat inuusuttullu angerlarsimaffiup avataanut inissinneqartarnerat annikinnerulernissaat pillugu ukkatarinnillutalu siunnerfeqartuarnissarput pingaaruteqarpoq maannakkullu meeqqat inuusuttullu pillugit immikkut Naalackersuisoqarfeqalersimanitsinni tamatuma pingaartinneqarneranik suliniuteqarnerup ersiutit ilagaat.

Meeqqat inuusuttullu pillugit suliniuterpassuit ingerlanneqartarsimasut maannakkut ukkatarinerullugit siunnerfigineqarneranni suliniutit ingerlareersut assigiissarneqarnissaat angerlarsimaffiup avataanut inissiisarnermik ukkatarinnissaat pingaaruteqartoq aarlartisarneqarlutik suliarineqaleruttortut Naleqqamiit tusaavagut neriulluarfigalutigillu qanoq iliuuseqartoqarnissaa Naleqqamiit pingaaruteqartutut isigigatigu.

Ilanngullugu pingaartutut isigaarput meeqqat inuusuttullu angerlarsimaffiup avataanut inissinneqartartut eqqarsaatigalugit 18-inik ukioqalernerata kingorna suliniutit ilanngullugit sukumiisumik ingerlanneqarnissaat pingaartutut Naleqqamiit isigigatigu.

Taamatut inuusuttunngulernerminni toqqissisimasumik periarfissaqarlutik inissinnissaat pingaaruteqaannarani ilinniarnissamik aqqutissiuunneqarlutik pitsaasumik inuuneqalernissaanut



aqutissiuinerit ataqatigiissaakkamik suleqatigiinnissutigalugit ingerlannissaat pingaartorujussuusoq Naleqqamiit isumaqarpugut.

Meeqqat inuusuttullu pillugit suliniuteqarnissamik iliuusissamik ataqatigiissumik kommunit suleqatigalugit suliniuteqarnissamik pilersaaruserluakkamik ingerlatsilernissaq Naleqqamiit pingaartutut isigaarput taamaammallu siunnersuuteqartup ujartugaanut naaperiaalluni Naalackersuisut allannguutissasut innersuussutaat Naleqqamiit tamakkiisumik tapersersorparput:

*Meeqqat inuusuttullu angerlarsimaffiup avataanut inissinneqartartut ikilisinneqarnissaat*

*siunertaralugu UKA 2022-mut ilaqutariinni pitsaaliuinerimik suliaqarneq pillugu iliuusissanut*

*pilersaarummik suliaqarnissamik Naalackersuisut peqquneqarput.*

Taamatut oqaaseqarluta Naalackersuisut allannguutissasut siunnersuutaat taperserlutigu ataatsimiititaliamut susasaqartumut innersuussutigaarput, ataatsimiititaliarlu suliamut soqutinartumut sulilluarnissaanik kissaallutigu.